

續
碑
傳
集



續碑傳集卷三十一

江陰繆荃孫纂錄

光緒朝督撫十一

劉忠誠公坤一別傳

朱孔彰

劉公坤一字峴莊湖南新甯人以諸生起家軍旅道咸之間湘粵之交羣盜如毛新甯土匪李沅發陷城戕官公與劉武愼公長佑赴寶慶府請兵收復縣城江忠烈公忠源奇其才欲招致軍中以公事父至孝親老不忍離而止咸豐五年丁父憂粵逆逼近縣治劉武愼率勇由東安縣回援函招入營公爲武愼族叔年少於武愼師事之故聞召卽至馳約各團刻期同進敗賊楊溪邨是爲公立功之始明年湖南巡撫駱秉章檄公募勇五百人隨劉武愼馳援江西甯抵萍鄉卽以生力軍攻克蘆溪司要隘進規袁州偵知僞侍衛李能通在賊中最久能得眾心公遂募購內綫招令出降推誠待之與李能通盛服並騎繞城大呼其黨降者晝夜不絕僞檢點張逆等宵遯遂收復袁郡論者謂援江之役以袁州爲最要門戶袁州失則毘連之臨江吉安瑞州各郡皆震公出奇制勝迅復堅城厥功甚偉七年率楚軍前鋒由分宜新喻直趨臨江抵

太平墟賊勢方熾遂至羅坊與湘軍及江西水師合圍臨江府城僞翼王石達開率悍黨來援公與劉武慎定計趁賊未集三路進擊賊眾驚潰溺死無算城中之賊亦潰圍遠遁遂克府城八年劉武慎請假回湘駱公秉章檄公代統其軍進攻撫州軍次秋溪賊於上游龍古渡夾河爲營公慮賊堅守撫州賊出而夾擊我軍腹背受敵遂簡銳卒三千乘夜疾進出賊不意踏平各壘又以湘營被圍於上頓渡復調二千人往擊破之賊遁走福建收復撫州乘勝攻克建昌江西全境肅清九年僞翼王石達開率大股賊號百萬犯湖南公在籍招募新楚義安勇二千屯衡州之龍海塘遏賊來路至永州遇賊前隊擊之大捷移駐祁陽赴援寶慶力解城圍隨同劉武慎追賊至廣西桂林克復柳州府城由知府擢道員明年劉武慎奏調至粵委赴東泉接統各軍時東南各省軍事甚棘粵西僻處邊隅餉糈支絀公威惠兼施軍容頓壯各賊相繼乞撫並收斬屢降屢叛者數人上游一帶次第平定十一年進攻潯州艇匪冒死上竄又陸匪數千輔之勢極披猖我軍船礮皆小公親赴江干督戰奮勇直前羣賊奪氣斃匪甚多首逆就獲汧流而上克復潯州府城布置略定遽聞石達開將由粵黔交界以竄川楚急率所部馳回柳

州扼要邀截行近融縣賊隊已至石逆以我軍守險併命來爭公親率勁騎橫擊之血戰竟日賊乃潰退斬僞官十餘人獲僞印甚多積功以按察使記名

賞給碩勇巴圖魯名號旋授廣東按察使同治元年升廣西布政使奉旨飭令迅速赴潯州辦理軍務與僞平潯王黃鼎鳳迭次鏖戰黃逆退歸天平寨公分兵收復橫州諸境悉平復用奇計攻取覃塘堅壘黃逆窮蹙出降磔之賊黨皆伏誅粵西藏垢匿瑕之地窮凶極惡之徒至此蕩滌殆盡黃鼎鳳憑險負固二十餘年勞文毅崇光在粵最久深以爲憂公竭兩年之力攻克堅巢巨憝授首粵西士民至今感頌四年簡授江西巡撫首劾貪劣守令十餘員每接見僚屬必舉作秀才時所見州縣衙門積弊懇切告誡刊發佐治各書令其置諸座右朝夕省覽裁汰各項陋規籌給瘠缺津貼吏治蒸蒸日上曾文正公稱公居心公正辦事精明見之奏牘又以江西軍興後餉項報銷四千餘萬各州縣交代積壓九百餘起輾轉膠轕流弊滋多公設局澈底清查嚴劾虧空之員並議裁各處門釐酌減坐賈釐金民困以蘇餘如修圩隄興水利辦積穀設粥廠添築貢院號舍百廢具舉復以江省徵收丁漕向有畫一章

程言者欲改定銀數如有不敷另准加收公慮有包庇侵漁之弊詳切陳奏力持前議得

旨允行江省至今循守公撫江西十年休養民生澄清吏道一時翕然稱頌十三年調署兩江總督士民不忍公去多有依戀感泣者光緒元年補授兩廣總督粵省官場積習過深營務亦多廢弛公到任後嚴加甄別參劾文武七十餘員官方肅然嗣兼署粵海關監督卸篆後餘銀二十餘萬兩奏明以十五萬兩解交藩庫

優詔嘉獎餘款悉以助振修隄及各項善舉之用未嘗一錢入己五年調兩江七年開缺回籍十六年復起爲兩江總督明年春履任時蕪湖等處匪眾焚燒教堂沿江騷動一夕數驚各國議調兵艦入江勢甚岌岌公相機因應調撥兵隊分往保護緝獲首要各犯立置重典旬日之間民情大定教案亦得從容議結十數年來籌辦江防沿江礮臺後膛者多雜式舊礮間有較新大礮則仍係前膛不能適用公令上海製造局仿造英國大鋼礮及快礮多尊勑造吳淞口附近獅子林礮臺皆設新造大礮其餘江陰等處各臺亦量爲添設沿江礮臺有新造後膛大礮自公始二十年中東事起奉

命赴山海關督師與日兵相持半載敬慎不敗而忠愛之忱尤見於阻和議三電奏略云臣於新令條約雖未深悉要之讓地賠款兩條目前固難以允行後患尤不堪設想宜戰不宜和利害輕重事理顯然此固天下所共知亦在

聖明所洞鑒惟一經決裂日人必分擾猛攻自以保京畿固遼瀋爲第一要義查遼瀋等軍依克唐阿長順陳湜等軍皆與日屢戰甚爲得力唐仁廉亦係宿將所部鎗械已齊當足以資抵禦更有宋慶魏光燾李光久諸軍駐紮甯錦一帶該將領等忠勇過人屢當大敵相機戰守似遼瀋後路可無他虞日人如圖犯京畿則自關至京沿海要口處處設防又有各大枝游擊之師日人縱能登岸究屬孤軍既有董福祥程文炳兩軍堵禦於前而津榆皆有重兵可以兩面夾擊一戰再戰以期必勝未必彼則長驅直入我卽一蹶不振萬一京畿喫緊臣必抽動勁旅迅速入衛以保無虞前電所云戰而不勝當可設法撐持者此也夫利鈍本難逆睹但日人遠來主客之形彼勞我逸近得探報日新軍多以老弱充數餉亦不繼在我只須堅忍苦戰否則高壘深溝嚴爲守禦日人懸師遠闕何能久留力盡勢窮彼將自爲轉圜之計況用兵兩年需

餉不過數千萬較賠款尚不及三分之一持久二字實爲現在制日要
著諸將一聞和約義憤填胸拚命決一死戰臣職在戎兵宗社所關惟
以殫竭血誠力任戰事斷不敢愛惜身命上負

國恩此外則非所敢知昨馳抵唐山與王文韶聶士成丁槐等面商意
見相同謹據實直陳明年四月十一日晚又電奏云和戰大局宗社所
關

朝廷當爲早權至計臣前兩次電奏已罄愚忱何庸再瀆惟近日外間
傳聞謂和局業經批准不日派員赴煙臺換約又得各處電報據俄法
德三國電阻日人割地條約日人未見允許各國屢聯致決絕之書又
稱日兵艦多艘開出廣島俄國決意開戰又稱伊藤甚急催中國先行
換約有事再商等語以上各節臣無從深悉亦未敢遽信如果屬實是
日已處極危之勢而我已有可乘之機各國羣起而攻以日兵力餉需
已苦難支方且自顧不遑何能攻我在我只展期換約觀釁而動則目
前之地步稍紓已可亟圖補救且約卽批准彼此未經互換行止仍由
我主持當各國紛起環攻我展轉與之展期極力磋磨彼何敢遽然決
裂若一經換約卽係定局縱各國攻取約內之地恐仍非中國所有日

人卽許以後再商已落後著與其挽回於事後曷若堅定於目前關繫非輕事機難得天下大較爭此關頭況中國一與交鋒日人自力難兼顧關津防務較鬆卽可抽調關內勁旅會合關外諸軍迅速分路猛攻收復遼東失地揣情度勢此尤機會之不可失者日島國耳今日已成虎狼又與我最爲逼處若得遼臺爲附兩翼中國必有噬臍之禍遼臺與日本國聯成一氣日益強盛將來卽求援西洋各大國亦無能制其死命若此次和議定約一任日爲所欲爲貽患無窮何堪設想現在如何消息出使許大臣想已密電陳奏在王大臣熟思審處必有微權臣所夕焦思不敢不據實上陳是否有當伏候

聖裁會沿海風災天津營壘多壞和議遂定公仍回兩江本任二十四年冬渦陽土匪滋事聚集二萬餘人縣城被圍是處爲捻匪老巢一經分竄將有燎原之禍公遣湘軍會安徽河南軍進剿一鼓盪平奉

旨優敘二十六年近畿拳匪之變公維持東南大局苦心孤詣堅定不

搖

優詔褒嘉是年七月有票匪在長江裕溪口搶去礮船擾大通毀劫鹽局釐局遠近震動公迅派開濟兵輪載衛字營勇駛往會合安徽防營

勦辦彈壓匪黨逆謀因之不得遽逞人心大安厥後力爭東三省條約
會商各國商約皆能統籌國家利害極力堅持有裨大局二十七年九
月終於位春秋七十有二公天性忠摯器量寬宏厯官封圻幾四十年
吏事最爲老練平日接下以和撫民以惠不爲棱角峭厲之行每遇有
危疑明決應機不爲眾論所淆惑古人所稱能斷大事洵無媿色其辦
理外交開誠布公和平而又堅定近年力保長江之約各國尤所佩服
身歿之日各國領事兵官先後來甯弔奠送殯並下旗誌悼江南士民
於此舉尤爲感頌不忘

評曰劉公曉暢戎機又長於吏事故任封疆數十年軍民悅服究其生
平學力多資於劉武慎有本有原而因應咸宜至晚值時艱能持大體
容保無疆古大臣以安社稷爲悅者其公之謂歟

贈太子太保兵部尚書銜福建臺灣巡撫一等男爵劉壯肅公神道碑

銘
馬其昶

公姓劉氏諱銘傳字省三合肥人曾祖某祖廷忠考惠世業農後皆以
公貴

贈如公官爵公生而英特有偉抱嘗登所居大潛山歎曰生不爵死不

諡非夫也會天下亂淮淝居民爭築堡寨自衛各相長雄一日有大豪
呼公考至馬前賁供給不時至訶罵而去公憤甚躡豪行數里奪其佩
刀殺之乘馬徐歸於時年十有八矣同治元年合肥李公以曾文正公
奏薦巡撫江蘇募淮勇東征公以千總從所將卒號銘軍連擊破川沙
奉賢福山解常昭圍合水師奪揚舍汛要隘苦戰六日乘勝下江陰取
無錫進攻常州奇兵出奔牛鎮降其酋推鋒直前寇復犯奔牛還軍卻
之再攻圍常州先登生獲寇酋陳坤書常州平積功至提督

賞黃馬褂而程忠烈已前定蘇州遂越境應浙軍攻嘉興克之至是公
平常州亦出屯句容以應江甯圍軍於是湘軍拔江甯殄洪寇積苦久
遂皆散遣羣捻復縱橫齊豫吳楚之郊曾公受

命督師湘軍將旣已罷歸乃益募淮勇設四鎮重兵公屯軍周家口戰
捷於瓦店於南頓於扶溝

詔授直隸提督仍率師援鄂克黃陂追賊至潁州大破之公以中原平
曠地賊四走疲我乃建議築隄扼沙河爲守賊潰突汴梁隄追創之於
鉅野捻首張總愚竄陝西任柱賴汶洸竄山東自是有東捻西捻之目
李公代曾公督師公率所部自鄆城至京山東西數十戰賊皆披靡望

風遁由是東至黃陂西至安陸襄棗北至南陽鄧銘軍常爲選鋒復議
防運河扼膠萊築長牆北起夏店南抵柳林口遏賊騎西六年引兵南
救沔陽追北至諸城日照還殪任柱於贛榆賴汶洸圖竄青濟聞道馳
維西北擊破之蹙之海濱殲其眾河流盡赤汶洸自投揚州防軍以死
東捻平論功最給三等輕車都尉乞假歸七年西捻張總愚由陝竄河
朔畿輔大震

詔責諸將率公臥疾在家坐逗留奪官李公假

朝命強起之會師進擊鹽山滄州德平李公仍議築牆臨邑屬之馬賴
河牆成值大雨徒駭河盛漲賊不得渡張總愚赴水死西捻平晉一等
男爵

詔駐師張秋資鎮守旋

命督軍陝西勦北山回匪引疾歸論者謂李公江蘇之功推程忠烈平
捻功公爲大忠烈攻嘉興遽戰死而公初起將五百人稍增至七千討
捻益騎兵合萬二千西防陝增多至二萬逮後臺灣之役以

吳數改巡撫位望乃益崇矣自程忠烈始議外國械器利其戰江蘇悉
改用新械淮軍竟以此勝而公尤以鐵道實自疆要圖其關於兵事利

害爲重光緒六年與俄羅斯爭伊犁約應

詔至都卽上言鐵道便利數大端李公因奏公主辦議格不行十年法蘭西擾海疆再起公以巡撫銜督臺灣軍務至七日基隆礮臺燬公以臺灣無兵艦不利海戰移軍基隆山後避礮彈且誘敵登陸尋擊斃法酋二兵百餘奪二艘他兵械數十有

詔褒美法兵以偏師絙基隆軍別遣五艦犯滬尾滬尾者基隆後路也距臺北府三十里軍資饕餮皆聚臺北公夜退師駐淡水犄角滬尾謗譏流聞取斷於中不眩時議敵益增艦來攻是時馬江已挫上海用三輪船濟師皆遏不達諸將冒風雨跣足督戰堅守八閱月

詔授福建巡撫明年購成朝議臺灣阻海峙南洋門戶當設立行省自治乃改公臺灣巡撫奏增一府一廳三縣生番窟宅臺南北七百餘里奔狂叫呶風氣湮闕擣虛斧頑釐其馴稚一皆化熟不以異類自疑念兵制久敝不饒給財用無能革新於是清丈田畝賦收倍經額而諸所創土田茶鹽金煤林木樟腦之稅亦充羨府庫始至歲入金七十萬其後至三百萬因益築礮臺購火器設軍械局水雷局水雷學堂要以興造鐵道爲綱紐輔之以電綫郵政功費大萬百餘公思以一島基國富

疆迹所已效威名樹立如其初志累加太子少保兵部尚書銜又
特命襄辦海軍事務嘗登滬尾礮臺東望日本歛歔感發曰卽今不圖
我爲彼虜矣已而戶部奏請天下十年內毋增置艦礮復喟曰人方慕
我我願欲樽俎折之乎遂三疏求去臺灣之立行省自公始公治臺灣
凡七年而歸歸四年而朝鮮難作屢

召不出遂以疾終於家春秋六十是年臺灣割隸日本遺疏入
天子軫悼贈太子太保諡壯肅建專祠史館立傳長子盛芬直隸候補
道前卒官其長孫朝仰三子盛芾皆員外郎朝仰承襲男爵次子盛芸
賜舉人襲三等輕車都尉四子盛芥舉人候選知府女四人皆適望族
配程氏夫人側室有出者曰項氏陳氏絕粒以殉得

旌者曰二李氏公以某年月日葬某鄉某原其諸孫朝望舉人刑部郎
中致公所爲大潛山房詩二卷並致狀曰先公墓碑未刻敢請銘乃銘
公所著別有奏議二十四卷藏於家辭曰

公專閫寄方壯其齒金節弼戈謔浪書史蟄居在壑公驩無止

皇杼外訁詔速公起公來氓驩彼驕亦駭韜智銜勇創古未有漲天大
澤納於一泄公胡遽歸公歸不埃疆場成壞彼此一時悲膺雄志雖死

而視焯功鑣詞萬古是記

又劉壯肅公家傳

程先甲

公諱銘傳字省三氏劉廬州合肥人也先世耕邑之西鄉至公而不以屑意有大志嘗登所居大潛山仰天歎曰大丈夫當生有實死有諡咸豐四年粵匪踞安慶陷廬州六安公倡團築堡賊憚之西鄉豪傑蠡午起數十里閒往往堡寨基置互相雄長亦時有攻伐一日別堡來攻力卻槍藥不繼其妻程夫人躬自造藥猶不繼老媪發其家所窖藥十數畧以進堡卒不動西鄉豪傑莫不怖公矣九年從大軍克六安保千總明年援壽州晉都司銜同治元年李公鴻章攝江蘇巡撫次上海募淮勇雅知公檄爲管帶官於是銘軍立焉降南匪賊首吳建瀛劉玉林復南匪建瀛所部三千人玉林所部千人皆屬焉別賊犯南匪擊卻之克川沙擢都司晉游擊銜攻奉賢金山衛克之擢參將

子驃勇巴圖魯名號從浦東還援破賊野雞墩又解四江口圍二年常昭苦賊久會諸別軍攻福山克之遂解常昭圍擢總兵與水師提督黃翼升同攻楊庫汛六日克之江陰賊復犯楊庫擊卻之偽忠王李秀成渡江還救合偽章王護王普王潮王侍王軍水陸數十萬分道內犯公

與諸別將各迎擊大破之七月進攻江陰克之

詔以提督記名九月攻無錫金匱克之

賞頭品頂戴十一月進規常州至奔牛鎮賊目邵小雙乞降受之攻常州小北門大土城克之偽章王犯奔牛欲以牽我常州之師往援大破之偽忠王以小輪船濟兵來爭並擊燬之六日奔牛圍解三年復規常州剗城外賊壘數十環攻之會禽偽護王陳崑書遂克常州

賞穿黃馬褂六月江甯殘賊操偽幼主竄踞廣德公從建平往擊克之復追北大破之四年春僧忠親王戰沒曹州捻大橫曾文正公奉

命視師之山東重公智略奏設四鎮重兵以周家口重任付之公於是屬曾公大破捻於瓦店又破之南頓解扶溝圍以公兵精易爲游擊之師冬率師援鄂克黃陂追北至茅屋店

上褒美之時公已授直隸提督

特命交部優敘其明年公念張牛任賴四捻渠忽分忽合馳馬隊於中原平曠之地剽忽數千里我師專主游擊非策也於是勑扼守沙河之議驅捻於沙河以南以蹙其勢公任朱仙鎮以下河防分汛築長牆俄汴梁隄牆爲捻毀分軍追擊之破之鉅野無何捻渠牛老洪氏張總愚

竄陝西任柱賴汶洸竄山東於是有西捻東捻李公代曾公視師公於是復屬李公督師逐東捻東至鄆城西至京山大小數十戰皆捷六年正月與鮑超軍追擊之安陸四月破捻黃安東又追北至宛郡屯信陽整軍兩月復躡捻逐之東自應山黃陂西出安陸襄棗又從南陽至鄭州日踔百里捻望風奔不得戰於是枹防守運河進扼膠萊之議六月與潘鼎新相度膠萊河道形勢乃合諸別軍分築長牆北起夏店南至柳林口秋破捻沐陽南解沐陽圍追北至諸城日照槍殪任柱賴汶洸圖竄青濟公從安邱間道馳濰迎擊之又夜擊之濰東北大破之捻西走新城截擊之東走壽光薄之於洋河瀾河閒盡殲之暴尸四十餘里河流盡赤諸任殄絕汶洸尋自投揚州防軍東捻平李公疏稱是役爲軍興罕有之奇捷論功公當第一

詔賞三等輕車都尉世職公自四年辦捻以來轉戰數省略無一日休病莫能騎乃乞假旋南七年西捻張總愚由陝竄河朔

詔旨促公乃馳赴東昌會諸別軍追擊張總愚於鹽山滄州德平疊破之捻圖撲運河與諸別將環遮之徒駭黃運閒縱橫夾擊盡殪之張總愚蹈水死西捻平晉爵一等男

詔次張秋九年

上命督辦陝甘軍務乃之陝移屯乾州部署戲下諸將略定未幾引疾歸自號大潛山人蒔花木竹石築盤亭圍碁賦詩若將終身焉

上卽位之十年法蘭西擾海疆

命督辦臺灣軍務寵以巡撫銜閏五月甲辰朔丁卯抵基隆行其礮臺僅有洋礮五且僅守面一方不能應敵之旁攻歎曰不足恃也居七日法來犯基隆礮臺果毀公以臺灣無兵艦不可與海戰乃移軍基隆山後以誘之且以屏礮頃之法登陸趨山巔而陣命章高元鄧長安東西抄擊之鎗斃法酋三法兵百餘奪纛旗二洋鎗數十桿帳房十餘架餘卒奔其艦奏入

慈禧皇太后爲頒內帑銀三千兩以勞軍七月法以偏師絀我基隆軍別以五艦犯滬尾滬尾者基隆後路也臺胞兵單去臺北府三十里而器械軍食悉萃臺北府滬尾失則臺北危基隆之師將自潰公乃夜率全師移駐淡水立揮諸將赴滬尾援內地聞公退基隆則駭然公曰兵事變化惡有隔海可遙度者邪不爲奪己而法益增兵艦我軍肉薄而拄鎗礮法艦別游弋滬尾口外匯利萬利華安三輪船又不克濟師其